

REGIONAL NEWS BULLETIN

HEADLINES (EVENING)

1. Krismas leh Kumthar hunpui boruak muanawm tak hnuai hman anih hnuin Mizoramah mipui ten waviin atang khan nunphung pangai an zawh leh tan.
2. Assam Rifles-te chuan Zokhawthara India leh Myanmar inkalpawhnaah khauh zawkin venhimna an kalpui.
3. Krismas leh Kumthar vuakveta Halpuah leh Halmawi hal avangin mi 14 man an ni tawh.
4. Waviin khan Prime Minister Narendra Modi-a chuan hmasawna hnathawh engemaw zat New Delhi-ah a hawng a, thawh leh tur lungphum a phum bawk.

<><><>

FIRST WORKING DAY OF 2025

Krismas leh Kumthar hunpui boruak muanawm tak hnuai hman a nih hnu in Mizoram ah mipui ten waviin atang khan nunphung pangai an zawh leh tan.

Hunpui avanga chawlh a nih hnu ah waviin ah Sawrkar Pisa te an kai leh tan a. Restricted holiday a nih angin tul zual thawk tur ni lo chu sawrkar hnathawk chawl an la tam hle a. Sawrkar Pisa a la thawl in dawr tur an la awm mang lo a, hetih lai hian Supplies department leh department thenkhat te chu mipui mamawh buaipui ngai reng an nih avangin an tul nghal hle thung a ni.

Voicecast : Lalengmawii Akashvani News Aizawl

Mizoram khawpui Aizawlah chuan mipui ten nunphung pangai an zawh leh tan a. Hetih rual hian khawpui lun thin lai leh Bazar te a la thawl hle a. Dawr thenkhat chu dawr theihin inhawng tawh mahse, dawr engemaw zat chu an la in khar thung a, Khawpui chhungah hun dang ang lo tak in traffic jam a awm lo a. Motor chhuak vak pawh tam lovin khawpui pawh a thawl hle a ni.

Waviin khan Chief Minister Office-a thawk te chuan Chief Minister Pu Lalduhoma kaihhruiin kum thar inhlan tharna hun CM Conference Hall-ah an hmang a,

He hunah hian Chief Minister Pu Lalduhoma chuan kum khat chhung tluang takin hna an thawkho chu lawmawm atih thu sawiin thawktute thawhrimna a fak a, thawkho zel tur an n ihna ah inpawh taka engkim ti tlang thin turin a chah a, Hna a tam avangin office hunbi pela an awm chang awm thin mahse taima taka mahni hna thawk theuh turin a chah a, hna hniam bik a awmlo tih sawiin sawrkarin a mamawh avanga lak anni tih hriaa theitawp chhuah chhunawm zel turin a chah a ni.

(DESK)

<><><>

INDO-MYANMAR BORDER

Assam Rifles te chuan Zokhawthara India leh Myanmar inkalpawhnaa mihring kaltlangna chu khauh zawkin venhimna an kalpui.

Zokhawthar atanga thudawn danin kumin January ni 1 atang khan helai ramria Assam Rifles duty te chuan lut leh chhuak turah document an phut a. India atanga Myanmar lama lut tur hian Champhai district-a Aadhaar card leh document dang nei lo chu tlang an phal lova. Myanmar atanga India lama lut turin anmahni thuneitute hriatpuina lehkha keng lo chu gate paltlang an phal lo bawk.

Zokhawthar VCP Pu Lalmuanpuia chuan Assam Rifles-in tuna khauh zawka mihring veivak an khuahkhirhna hi Home Ministry atanga December thlaa thupek an dawn tawh a nih thu Akashvani palai an hrilh a. Assam Rifles lam hian an thudawn hi ziakin khawtlang hruaitute hnenah an hmuh lem lo ni a hriat a ni.

Myanmar lamah hian Mizo hnam ziaranga hmun pawimawh Rihdil leh Buannel te chu tun chawlh vuakvetah Mizoram atangin tlawhtu an thahnem hle a ni.

(Lahlpuia PTC Champhai)

<><><>

VIOLATION OF FIRECRACKER BAN

Krismas leh Kumthar vuakveta Halpuah leh Halmawi hal avangin mi 14 man tawh an ni.

Aizawl SP Pu Rex Zarzoliana'n Akashvani Aizawl News a hrilh danin Krismas leh Kumthar vuakveta halpuah leh halmawi khapna thupek chhuah atangin Halpuah leh halmawi ah case 12 ziahluh niin

mi 14 an man a ti a, halpuah leh halmawi man chu chuang nuai 23 chuanga tling tih sawiin man zingah a neitu hriatloh pakhat a awm tih a sawi.

Aizawl SP sawi danin Bawngkawn Police Station ah pahnih man niin Kulikawn leh Vaivakawn PS ah pakhat ve ve a ni a ti a, Kumin Krismas leh kumthar vuakveta khapna thupek chhuah hnuah Halpuah leh halmawi hal anga puh anih vangin mi pakhat man a ni a, jail a dahluh nghal a nih thu a sawi.

Pu Rex Zarzoliana chuan Halpuah leh halmawi hal avangin case 33 ziahluh ani tawh tih sawiin la man loh te hi Court in koh tura a tih an ni a ti a, Mizoram Police chu hmun hrang hrangah hunpui lain zan duty an indah tih sawiin venhimna tha takin an kalpui tih a sawi bawk.

(CORR - Lalengmawii)

<><><>

RAMTHAR YMA

Mizo te nuna bet tlat Zo Nun Ze mawi tlawmngaihna chu khawvel changkang zel ah a dal deuh ta ti a sawi a awm thin lain, chhiat tawh nikhua in Mizo thalai te tlawmngaihna hmuh tur a la awm chhonzawm zel.

Aizawl-a Ramthar Veng YMA te chuan an veng thenawm Electric Veng tên chhiat an tawh zawn avangin Tukin khan thlan laih pui in an thawk chhuak a, Electric Veng ah hian nikum December Ni 19 atanga kumthar ni 2 thleng khan mitthi 11 neiin, an mitthi te hi lu men ngai deuh vek an ni a. Tunhnaia boral te chu a zawna lu men ngai pathum an ni a, heih hria in, Ramthar veng Branch YMA chuan thuchhuah siamin an veng thenawm Electric Branch YMA chu thlan laih pui nise tiin Ramthar Veng Branch YMA executive committee chuan a rel a, Hnatlang an koh hnu in tukin khan Electric Veng thlan lai pui turin Mizo Tlangval engemaw zat an thawk chhuak a ni.

Electric veng YMA leh Ramthar YMA thlan laia thawk chhuak hi an vaiin mi 130 bawr ni a chhinchhiah a ni.

Voicecast : Lalengmawii Akashvani News Aizawl

Mizo tlawmngaihna Zo Nun Ze Mawi kan tih hi tunlaiah kalpui a remchan lohna tam tak awm mahse YMA branch hrang hrang ten anmahni huamchung theuhah theihtawp chhuahin an la kalpui chhonzawm zel a, Thlan laih mai bakah khawhar chhungte in lenpui leh chhiat thata inpuih tawn chu tun hma atanga an thidan chhonzawmin Mizoram hmun hrang hrangah kalpui chhonzawm zel a ni.

(DESK)

<><><>

AIZAWL NEW MARKET

Commerce & Industries Dept hnuiaia Aizawl New Market Bazarpu Marketing Inspector Pu Vanlalsawma'n hunpui vuakvetah bazara mipui kal ten thupek tha tak an zawm avangin lawmthu a sawi.

Akashvani Aizawl news nena an inkawmna ah Pu Vanlalsawma chuan kum 2024-a Aizawl Bazarpu New Market-ah thil tibo 56 an awm a ti a, Pawisa tihbo zat chu cheng nuai 1, sing 7 4100 a ni tih sawiin Krismas leh kumthar inkara pawisa tibo ten an hmu let leh tih sawiin mi bo an awm lo tih a sawi bawk.

New Market hotute sawi danin hunpui vuakvetah thilruk hmang chetna awm an hriatloh thu leh rukruk report a awmlo an ti a, mipui bazar tura kal ten thupek an zawm tha tih sawiin bazar tura hmun hrang hranga kal ten an thlawpna ah lawmthu an sawi bawk.

(CORR - Lalengmawii)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

(Corr)

<><><>

OUTGOING GOVERNOR

Mizoram larsap kal chhuak Dr. Hari Babu Kambhampati chu vawiin khan Odisha Governor ni turin rinawmna thu tiam tira lakluh a ni.

Larsap hian nimin tuk dar 8 khan Aizawl Raj Bhavan a chhuahsan a, Odisha pan nghalin vawiin khan Governor ni tura lakluh a ni.

Mizoram Governor thar tur Gen. Vijay Kumar Singh chuan January ni 8, 2025 khan Mizoram a lo thleng dawn a. Ruahman dan chuan a tuk January ni 9, 2025 khian Raj Bhavan-ah Mizoram Governor 23-na ni tura lakluh a ni ang.

(DESK)

<><><>

PM MODI LAUNCHES MULTIPLE DEVELOPMENT PROJECTS IN DELHI

Vawiin khan Prime Minister Narendra Modi-a chuan hmasawmna hnathawk engemaw zat New Delhi-ah a hawng a, thawh leh tur lungphum a phum bawk.

Prime Minister hian New Delhi-a Ashok Vihar hmuna JJ cluster-ah chenna tur sak thar kaw 1700 a hawng a, a awm turte hnenah chahbi a hlan nghal a. Henga cheng turte hi a kawm bakah in sak tharte chu a endik nghal bawk a ni. Hei hi In-Situ Slum Rehabilitation Project hnuai Delhi Development Authority hmalakna a ni.

He hunah hian Prime Minister chuan Urban redevelopment project hnuai sak project 2 – Nauroji Nagar-a World Trade Centre leh Sarojini Nagar-a General Pool Residential Accommodation (GPRA) Type-II Quarters a hawng nghal bawk a. Dwarka-ah Central Board of Secondary Education ta tur Integrated Office Complex a hawng a. Delhi University-a project thar 3, cheng vbch 600 chuang senga sak tur lungphum a phum bawk a. Hmasawna hnathawh dangte pawh hawngin thawh lehzel tur lungphum a pum bawk a ni.

Vawiina an thil hawn chuan Delhi mipuite khawsak a tihzangkai tur thu Narendra Modi-a chuan a sawi a, kum 2025 hi khawvela India dinhmun sawhnghehna tur kum a ni a ti.

(NewsOnAIR)

<><><>

UNION MINISTER ASHWINI VAISHNAW LAUNCHES SEVERAL DEVELOPMENT PROJECTS FOR ASSAM

Union Minister Ashwini Vaishnaw chuan vawiin khan Assam hmasawna tur project engngemaw zat a hawng.

Union Minister for Information & Broadcasting, Railways and Electronics & Information Technology Ashwini Vaishnaw chuan, Governor Lakshman Prasad Acharya leh Chief Minister Himanta Biswa Sarma-te nen rel 3 – Guwahati - New Lakhimpur Jan Shatabdi Express te, New Bongaigaon leh Guwahati inkara khualzin phur rel leh Tinsukia - Naharlagun Express-te an vailiam a ni.

Ashwini Vaishnaw hian Guwahati atangin 10 KW Akashvani Kokrajhar FM Station leh National Institute of Electronics & Information Technology, Guwahati chu biakhmuhtheihna kaltlangin a hawng bawk a ni.

He hunah hian Ashwini Vaishnaw chuan Prime Minister Narendra Modi-a chuan Look East Policy chu Act East Policy-ah hmarchhak ram hmasawna atan a thlak a, tunah chuan sum leh pai a luang lut hum hum a ni a ti.

(NewsOnAIR)

<><><>